



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
DOM NARODA

Administrativna komisija
Komisija za finansijsko-administrativne poslove
Broj: 01/7, 02/3-011-509/03
Sarajevo, 5.5.2003. godine

ZAPISNIK

2. zajedničke sjednice Administrativne komisije Predstavničkog doma i Komisije za finansijsko-administrativne poslove Doma naroda Parlamentarne skupštine BiH. Sjednica je održana 9.4.2003. godine, u vremenu od 16,00 do 20,00 sati.

Sjednici su prisustvovali članovi Administrativne komisije Predstavničkog doma:

Munib Jusufović, Nikola Kragulj, Hazim Felić, Ivo Miro Jović, Jozo Križanović, Momčilo Novaković, Šefik Džaferović, Mirko Blagojević i Vinko Zorić.

Sjednici su prisustvovali članovi Komisije za finansijsko-administrativne poslove Doma naroda: Zoran Spasojević, Mustafa Pamuk, Osman Brka, Branko Zrno, Goran Milojević i Velimir Jukić.

Sjednici su prisustvovali Vedran Hadžović, sekretar Zajedničke službe, Branka Todorović, sekretar Predstavničkog doma, Jadranko Tomić, sekretar Doma naroda, Aljoša Čampara, sekretar Ustavno-pravne komisije i privremeni sekretar Komisije za finansijsko-administrativne poslove Doma naroda, Mirjana Crnjak, šef Opće službe, i Dragica Hinić, stručni saradnik u radnim komisijama Parlamentarne skupštine BiH.

Sjednicom su predsjedavali Zoran Spasojević i Munib Jusufović.

Na sjednici je predložen sljedeći

DNEVNI RED

1. Usvajanje zapisnika 1. zajedničke sjednice administrativnih komisija oba doma;
2. Prijedlog odluke o pravima poslanika i delegata na stalnom radu u Parlamentarnoj skupštini BiH nakon 5.10.2002. godine;
3. Prijedlog odluke o pravima savjetnika članova kolegija oba doma PSBiH;
4. Prijedlog izmjena i dopuna Odluke o organizaciji Sekretarijata Parlamentarne Skupštine BiH («Sl.glasnik BiH», br. 5/00);
5. Prijedlog izmjena i dopuna Pravilnika o plaćama i nadoknadama državnih službenika i namještenika u Sekretarijatu PSBiH;
6. Žalba Lejle Tafro;
7. Tekuća pitanja.

Munib Jusufović predložio je izmjenu dnevnog reda, tako da bi se u tački 2. navedeni prijedlog odluke razmatrao kao podtačka a), dok bi se pod podtačkom b) razmatrao Prijedlog izmjena i dopuna Odluke o pravima poslanika i delegata PSBiH, vezanih za usklađivanje koeficijenta za obračun plaća predsjedavajućim domova i njihovim zamjenicima, predsjedavajućim komisija i klubova, te poslanicima i delegatima sa koeficijentima Vijeća

ministara BiH. Predložio je, također, brisanje tačke 4., jer ova tačka nije usaglašena na zajedničkoj sjednici oba kolegija.

Vinko Zorić predložio je da se pod tačkom 2. razmatra još jedna podtačka c), vezana za izmjenu i dopunu Odluke o pravima na angažiranje vozača i naknadama za vozače.

Predložio je, također, da se pod tačkom tekućih pitanja razmatra pitanje izmjena odluke koja tretira pitanje isplate dnevnica za službena putovanja u slučajevima umanjjenja.

Navedeni prijedlozi izmjena dnevnog reda usvojeni su jednoglasno.

Ad.-1.

Zapisnik 1. zajedničke sjednice članovi obje komisije usvojili su jednoglasno.

Ad.-2.

- a) Zoran Spasojević informirao je da je na 1. zajedničkoj sjednici ovih komisija, Komisija Predstavničkog doma izglasala smanjenje roka za isplatu plaća na šest mjeseci, dok komisija Doma naroda nije. Saglasno tome, ostala su neriješena tri zahtjeva poslanika, o kojima mora odlučivati Administrativna komisija Predstavničkog doma.

U raspravi su učestvovali: Munib Jusufović, Vinko Zorić, Hazim Felić i Vedran Hadžović.

Munib Jusufović smatra da se zahtjevima ranijih poslanika ne bi moglo udovoljiti, ali da se može ići na kompromisno rješenje, po kome bi se tim zahtjevima udovoljilo, ali bi isplata tekla za šest mjeseci.

Vinko Zorić smatra da se zahtjevima treba udovoljiti i primijeniti odluku, vezano za dužinu isplate plaća od šest, odnosno dvanaest mjeseci, saglasno radnom stažu.

Hazim Felić istaknuo je neprincipijelnost u odlučivanju i smatra da se zahtjevima ne može udovoljiti, saglasno postojećoj odluci.

Po okončanoj raspravi, odlučeno je da se o zahtjevima tri poslanika raspravlja i odlučuje na sjednici Administrativne komisije Predstavničkog doma.

- b) Zoran Spasojević informirao je prisutne o dopisu Vijeća ministara BiH, vezanim za visinu koeficijenata za isplatu plaća rukovodećim osobama.

U potom otvorenoj raspravi učestvovali su: Munib Jusufović, Šefik Džaferović, Jozo Križanović, Nikola Kragulj, Mustafa Pamuk, Vinko Zorić, Momčilo Novaković, Branko Zrno, Hazim Felić i Osman Brka.

Munib Jusufović predložio je da predsjedavajući domova i njihovi zamjenici imaju koeficijent 8,70, a predsjedavajući komisija i klubova, te poslanici i delegati onoliki koeficijent koliko odluče komisije, kako bi se ostvario dignitet Parlamenta u odnosu na druge izvršne organe vlasti.

Šefik Džaferović istaknuo je da je koeficijentom od 8,70 Vijeće ministara ukinulo paušal, a istovremeno u taj koeficijent uključilo i funkcionerski dodatak. On smatra da se ne može izglasati ovaj koeficijent i posebno isplaćivati paušal.

Jozo Križanović saglasan je sa mišljenjem Šefika Džaferovića.

Vinko Zorić smatra da predsjedavajući Vijeća ministara BiH ne može imati veću plaću od predsjedavajućih domova i njihovih zamjenika te da je paušal drugačiji od funkcionerskog dodatka.

Momčilo Novaković smatra da je ovo vrlo osjetljivo pitanje i da bi bilo dobro da ga predsjedavajući ovih komisija riješe sa Vijećem ministara.

Mustafa Pamuk istaknuo je da je 1997. godine učestvovao u izradi Pravilnika Skupštine i Vijeća ministara i utvrđen je isti koeficijent predsjedavajućeg Vijeća ministara i predsjedavajućih domova. Naglasio je da je funkcionerski dodatak različit od paušala i da je

funkcionerski dodatak u Vijeću ministara ušao u penzioni osnov za razliku od paušala. Također smatra da Vijeće ministara ne može povećavati svoje plaće bez saglasnosti Parlamenta.

Branko Zrno i Osman Brka istaknuli su potrebu za dignitetom Parlamenta i poslanika u odnosu na Vijeće ministara.

Zoran Spasojević predložio je kompromisno rješenje, kako ne bi donosili ishitrene odluke, u smislu provođenja konsultacija sa predsjedavajućim Vijeća ministara, nakon čega bi se na sljedećoj sjednici donijela odluka.

Hazim Felić i Šefik Džaferović istaknuli su da se mora biti odgovoran u donošenju ovakvih odluka. Potrebno je imati egzaktnu podatke prilikom donošenja odluka s obzirom da će ove izmjene dovesti do promjena u rebalansu budžeta. Ovim koeficijentima povećale bi se plaće za oko 800 KM po poslaniku, što bi dovelo do povećanja budžeta za oko 600.000 KM mjesečno, a za šta ne postoje realni izvori sredstava. Istaknuli su da neće glasati za predložene izmjene koeficijenata.

Po okončanoj raspravi pristupilo se glasanju o prijedlozima izmjena odluke kako slijedi:

- a) O prijedlogu za izjednačenje koeficijenata i plaća predsjedavajućih domova i njihovih zamjenika sa koeficijentom predsjedavajućeg Vijeća ministara, te plaća ostalih predsjedavajućih komisija i klubova i poslanika-delegata sa funkcionerima u Vijeću ministara, glasale su obje komisije. Administrativna komisija Predstavničkog doma usvojila je prijedlog sa 7 glasova za, 1 uzdržanim glasom i 1 glasom protiv Šefika Džaferovića, koji je izdvojio svoje mišljenje i istaknuo da ne želi primjenu povećanih koeficijenata pri obračunu svoje plaće, nakon čega je napustio sjednicu.

Komisija Doma naroda je, također, jednoglasno, sa 6 glasova za, usvojila navedeni prijedlog.

- b) Po usvajanju prvog prijedloga o izjednačavanju plaća, pristupilo se glasanju o izmjeni koeficijenata. Glasalo se prvo o prijedlogu za utvrđivanje koeficijenta za isplatu plaća u visini od 8,70 predsjedavajućim domova i njihovim zamjenicima.

Administrativna komisija Predstavničkog doma usvojila je prijedlog sa 6 glasova za i 2 uzdržana glasa.

Komisija Doma naroda jednoglasno je, sa 6 glasova za, usvojila prijedlog.

- c) Dalje se glasalo o prijedlogu za utvrđivanje koeficijenta za isplatu plaća predsjedavajućim komisija i klubova u visini od 8,50, a poslanicima i delegatima u visini od 8,40.

Administrativna komisija Predstavničkog doma usvojila je prijedlog sa 6 glasova za i 2 uzdržana glasa.

Komisija Doma naroda jednoglasno je, sa 6 glasova za, usvojila prijedlog.

Po usvojenim prijedlozima Vedran Hadžović istaknuo je da ove izmjene koeficijenata uzrokuju i promjenu prijedloga rebalansa budžeta i predložio da se odluka primjenjuje od dana usvajanja rebalansa.

Munib Jusufović istaknuo je da bi čekanje usvajanja rebalansa dovelo do odgađanja primjene ovih izmjena odluke, te predložio da se ove izmjene odluke primjenjuju od 1.5.2003. godine.

Jozo Križanović smatra da se moramo pridržavati zakona i trezorskog poslovanja, stoga ne bi imali sredstva za isplatu sve do usvajanja rebalansa.

Potom se pristupilo glasanju o primjeni izmjena Odluke o povećanju koeficijenata od 1.5.2003. godine, tako da je Administrativna komisija Predstavničkog doma usvojila ovaj prijedlog sa 6 glasova za, 1 glasom protiv i 1 uzdržanim glasom, dok je Komisija Doma naroda jednoglasno, sa 6 glasova za, usvojila prijedlog.

- d) Vinko Zorić predložio je da , saglasno zaključku Predstavničkog doma o izjednačavanju prava poslanika i delegata , ostane na snazi Odluka o pravu na angažiranje vozača, koja je bila privremenog karaktera, tako što će se brisati član 3. u pomenutoj odluci i da prava iz te odluke imaju i predsjedavajući komisija oba doma. Ovaj prijedlog jednoglasno su usvojili članovi obje komisije, a ova odluka primjenjivat će se od dana donošenja. Također, usvojen je zaključak, kojim je zadužen Sekretarijat da izradi predračun ovih sredstava, kako bi se u rebalansu osigurala navedena sredstva.

Ad.3.

Vedran Hadžović ukratko je informirao o statusu savjetnika, koji, po Zakonu o državnoj službi, nisu državni službenici, tako da je neophodno donijeti odluku, kojom će biti regulirana prava ovih lica.

U raspravi su učestvovali Momčilo Novaković, Zoran Spasojević, Jozo Križanović, Munib Jusufović, Velimir Jukić, Vedran Hadžović i Branko Zrno.

Momčilo Novaković smatra da treba brisati stav 3. tačke 11. ove odluke, koja tretira pitanje umanjenja dnevnica za službena putovanja, ukoliko je obezbijeđena hrana, smatrajući to nepotrebnim. U članu 20.stav 2. smatra da se ne treba pozivati na entitetske propise, već decidno regulirati ovo pitanje. Također smatra da se ova odluka, kao i odluka po sljedećoj tački dnevnog reda, treba doraditi do naredne sjednice.

Jozo Križanović, Munib Jusufović, Velimir Jukić i Branko Zrno smatraju da se cijela odluka može definirati putem 3-4 člana, jer su to opća prava iz radnog odnosa.

Vedran Hadžović obrazložio je naknadu za bolovanje, koja, po zakonu, državnim službenicima za prvi mjesec dana iznosi 100%, a namještenicima 90%.

Svi prisutni istaknuli su da se radi o čistoj diskriminaciji i da zakon u tom smislu treba mijenjati.

Potom su članovi obje komisije jednoglasno usvojili zaključke:

- da se briše stav 3. člana 11.Odluke o pravima savjetnika, koji tretira pitanje smanjenja dnevnica , te da se njihova prava reguliraju putem nekoliko članova jer su opća i istovjetna prava iz radnog odnosa;
- da se svima za prvi mjesec bolovanja isplaćuje naknada od 100%;
- sve ove izmjene potrebno je ugraditi i pripremiti za sljedeću sjednicu.

Ad.4.

Vedran Hadžović istaknuo je da se radi o istovjetnim pitanjima o kojima se već raspravljalo, vezano za prava savjetnika u prethodnoj tački dnevnog reda .To se odnosi na pitanje naknade za bolovanje, naknade za odvojeni život od porodice i plaćanje zakupnine za smještaj gdje su urađene dvije alternative. Jedna alternativa je u visini naknada, koju po ovom osnovu primaju poslanici, saglasno postojećem zakonu koji im to pravo omogućuje u roku od 2 godine, i druga alternativa - u visini osnovice za obračun plaća od 240 KM.

Zoran Spasojević je, saglasno tome, predložio da se, u pogledu prava vezanih za naknade bolovanja, izjednače savjetnici, državni službenici i namještenici, dodajući također da se ti prijedlozi izmjena pripreme za narednu sjednicu, za koju će ostati i alternativni prijedlog visine naknada za odvojeni život od porodice i troškove smještaja za državne službenike i savjetnike.

Ovaj zaključak članovi obje komisije jednoglasno su usvojili.

Branko Zrno izrazio je zadovoljstvo i istaknuo pozitivno iskustvo u radu sa zaposlenim u Sekretarijatu Parlamenta , te stoga smatra da bi i njihov rad bilo potrebno adekvatno valorizirati.

Potom je jednoglasno usvojen zaključak, po kome je potrebno pripremiti visinu plaća zaposlenih u Parlamentu i Vijeću ministara.

Ad.5.

a) Vedran Hadžović informirao je prisutne da Administrativna komisija Predstavničkog doma nije nikada donijela odluku po žalbi Lejle Tafro, što je neophodno učiniti.

Nakon kraće rasprave zaključeno je da se navedena žalba razmatra na sjednici Administrativne komisije Predstavničkog doma, s obzirom da je o ovoj žalbi komisija Doma naroda donijela odluku.

b) Vinko Zorić predložio je da se iz odluke, koja tretira pitanje smanjenja dnevnica poslanicima u slučaju obezbijedene ishrane, brišu ova ograničenja i da se u članu 15. doda da se dnevnica ne može umanjivati.

Munib Jusufović istaknuo je probleme vezane za isplate dnevnica u službi računovodstva i predložio da se dnevnice isplaćuju na dosadašnji način, a ne putem računa.

Oba navedena prijedloga članovi obje komisije jednoglasno su usvojili.

Zapisnik sačinila:

Dragica Hinić

Predsjedavajući Komisije
za finansijsko-administrativne poslove
Doma naroda
Zoran Spasojević

Predsjedavajući Komisije za
administrativne poslove
Predstavničkog doma
Munib Jusufović